

## BO NADAL?

Si, ao final son os nenos os que mellor entenden  
este tempo estremecido de Nadal.  
Son eles, os que soñan tempos novos, cheos de Luz  
que a todos nós, quentarán.  
Ao final, se queremos, deberemos volvernos nenos  
para erguer co corazón onda o portal  
e correr de novo, sobrevoando as figuras de barro  
e a fariña que é neve, no noso corazón, nas nosas mans.  
Ao final, habitaremos o soño de querernos,  
xuntando aquel noso mundo, sobre o chan  
cos recortes de nós mesmos mirados no silencio  
polos camiños que levan cara adiante, camiñando a un portal.  
Sobre un manto de luz que se dá cita, na noite, baixo as estrelas  
e xuntan a San Xosé, co Neno e coa súa Mai.  
Ao final, todo o mundo se trastorna e busca o Sol  
nun ollar esperanzado, de lumieira universal  
pois o amor é esa luz, nesta inocente tenrura,  
entre ríos e montañas, en Begonte, un camiñar.  
Prados de musgo, vales con árbores, xente que vén, xente que vai,  
rios de prata, montes de neve, pezas de barro que a Belén van,  
levan presentes, ovos, manteiga, bolas de pan.  
E son nubes de algodón, tres reis magos, pastores da Terra Cha  
chegan sobre serraduras de madeira  
que arredan a lama dos rueiros e levan a noite,  
coa luz da Lúa e unha alta estela ... chegan alá.  
Pasan rabaños e pontes, rapaces e mozos,  
mulleres e homes que están a cantar.  
Casas de pedra e tellados de lousa, a neve alfombra fríos

alá lonxe, polas terras Orientais.  
Ao final, as sombras da noite albergan novos fuxidos,  
os pobres eternos que escapan da fame, da guerra e buscan a paz.  
O castelo de Herodes segue neste mundo ruín  
que fixo un camposanto coas augas do mar  
e as noites da historia, están sobre collidas ao repetirse,  
ano a ano, e volven a nós para aquel Neno lembrar.  
Fachuzo da noite da Chaira, non pode esquecer,  
nin perder os soños: hai que ir arrolar.  
Son refuxiados, emigrados, exiliados, ... e séntese unha vella canción  
que arroupa, en doce voz o durmir dun Neno, que non deixará de amar:

*«Durme, meu Neno durme; durme,  
que te durmirás sen esquecer aos que sofren  
a indiferenza mortal».*